

Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat

Aalisarneq pillugu Inatsisartut inatsisaanni nr. 29, 23. maj 2024-meersumi § 6, imm. 3, § 7, imm. 1, § 12, § 14, imm. 1, § 15, § 18, imm. 2, § 23, § 24, imm. 1, § 25, imm. 3, imm. oqaaseqatigiit aappaat aamma § 68, imm. 2 aamma 3, naapertorlugit makkua aalajangersarneqarput:

Kapitali 1

Atuuffissaa nassuiaatillu

Atuuffi

§ 1. Nalunaarut atorineqassaaq inuussutissarsiutigalugu aalisarneq pineqartillugu:

- angallatit Kalaallit Nunaanni nalunaarsorsimasut,
- qimussit,
- angallatit nunanit allaneersut atorlugit Kalaallit Nunaata aalisarnikkut oqartussaaffigisaani aalisarnermi aamma
- angallatit nunanit allaneersut kalaallit pisassiissutaannik Kalaallit Nunaata aalisarnikkut oqartussaaffigisaata avataani aalisartut.

Imm. 2. Nalunaarut tamatuma saniatigut atorineqassaaq, saarullinnik inuussutissarsiutigalugu aalisarnermi tunisinissamut akuersissummik peqartunut, § 25 naapertorlugu.

Nassuiaatit

§ 2. Nalunaarummi uani uku pineqarput:

- "Aalisarneq pillugu inatsit": Aalisarneq pillugu Inatsisartut inatsisaat qaqugukkulluunniit atuuttoq.
- "Kalaallit Nunaata aalisarnikkut oqartussaaffigisaat": Kalaallit Nunaata kisimiilluni aalisarnikkut oqartussaaffigisaat, Kalaallit Nunaata kisimiilluni aningaasarsiornikkut oqartussaaffigisaat aamma Kalaallit Nunaata imartaq oqartussaaffigisaat pillugu Kunngip peqqussutai sukkulluunniit atuuttut naapertorlugit aalajangersagaavoq.
- "Tunngaviummik killeqarfik": Tunngaviummik killeqarfik, Kalaallit Nunaata kisimiilluni aningaasarsiornikkut oqartussaaffigisaat pillugu Statsministereqarfiup nalunaarutaani aalajangersakkat.
- "Kitaa": Kalaallit Nunaata aalisarnikkut oqartussaaffigisaata ilaa, tassunga kangerluit ilaasut ilanngullugit, avannarpassissut 59°-ip avannaani, kippasissut 44°-p kitaani aamma avannarpassissut 59°-ip kujataani, kippasissut 42°-p kitaani inissisimasooq.

- 5) "Tunu": Kalaallit Nunaata aalisarnikkut oqartussaaffigisaata ilaa, tassunga kangerluit ilaasut ilanngullugit, avannarpassissutsip 59°-ip avannaani, kippasissutsip 44°-p kangiani aamma avannarpassissutsip 59°-ip kujataani, kippasissutsip 42°-p kangiani inissisimasooq.
- 6) "Avataasiorluni aalisarneq": Kalaallit Nunaata aalisarnermut oqartussaaffigisaani tunngaviusumik killeqarfiata avataani 3 sømilip avataani aalisarneq.
- 7) "Sinerissap qanittuani aalisarneq": Kalaallit Nunaata aalisarnermut oqartussaaffigisaani tunngaviusumik killeqarfiata avataani 3 sømil tikillugu aalisarneq.
- 8) Uuttuut "BT": Usinnaasaq tamakkiisoq. Angallatip tonsinngorlugu usinnaasaanut uuttuut pillugu allakkani taaneqartoq, angallatip usinnaasaanut tamakkiisumut nalunaarsuineri atorineqartarpoq.
- 9) Uuttuut "a.t.t.": Angallatip tamakkiisumik takissusaa, angallatip isorpiaaniit aqorpiaanut qeqqa atuarlugu uuttortarneqartoq (angallatip tamakkiisumik takissusaa).
- 10) "Tunisussaataaneq": Akuersissumut piimasaaqatit, pisat amerlassusaannik aalajangiisuusut, Kalaallit Nunaanni nunami suliffissuarmut suliareqqinneqarsimanatik tunineqassapput.
- 11) "Sulieqqiisarneq": Pisanik suliarinninneq tamarmi, saliineq, niaquiaaneq sikulersuinerlu ilanngunnagit.
- 12) "Taamaaqataanik akuersissut": Aalisagaqatigiinnut assigiinnut aalisariutinullu assigiinnut, avataani imaluunniit sinerissap qanittuani aalisartut, aalisarnissamut akuersissut.
- 13) "Ingerlatsisut nutaat": Aalisartut, tassaasinnaapput inuit imaluunniit inatsisitigut pisinnaatitaasut inuit, aalisarnissamut qinnuteqarfigineqartumut taamaaqataanik akuersissummik ukiumi ullorsiuteqarfiusumi siuliani peqarnikuunngitsut.
- 14) "Angallat": Angallat 6 meter a.t.t.-mit anginerusoq, angallat 6 meter a.t.t.-it takitigisoq naannerusorluunniit, ATV, qamutit, qamuteralaat imaluunniit motoorillit aalisarneri atorineqartut.
- 15) "Attartornissamik isumaqatigiissut": Angallammik attartornissaq pillugu isumaqatigiissut, inuttaqartillugu (nalunaaquttap akunnikkaartumik attartorneq) imaluunniit inuttaqartinnagu (marloqiusamik nalunaarsukkamik attartorneq), piffissami aalajangersimasumi aalajangersimasumik aalisarnermut atugassaq.
- 16) "Inuussutissarsiutigalugu aalisarneq": Pisat tamarmiusut taakkualuunniit ilaasa tunineqarnissaat siunertaralugu aalisarneq.
- 17) "Inuussutissarsiutiginnagu aalisarneq": Pisat nammineq atorineqarnissaat siunertaralugu aalisarneq.
- 18) "Aqutsiveqarfik 47": Imartaq Kalaallit Nunaata Kitaani tunngaviusumik killeqarfiup 3 sømilit tungaanut iluaniittoq, kujammut avannarpassissuseq 68°30'-mi avannamullu avannarpassissuseq 75°00'-imi taakkualu kangerluttaanni killeqartinneqartoq (Qeqertarsuup Tunua kiisalu Uummannap sullua, aamma Upernaviup eqqaa).
- 19) "PNNP-mik aqqissuussaq": Aqutsiffik aalisarnermut inatsimmi kapitali 7-imi pineqartoq.
- 20) "Paggatassiineq": Pisarineqarsinnaasunit tamarmiusunit (TAC) aalajangersaaffigineqarsimasunik aalisarneq, ingerlataqartunulli ataatsiakkaanut pisassat amerlanerpaaffilerneqarsimannngitsut.
- Imm. 2.* Tamatuma saniatigut nalunaarummi nassuiaatinut oqariartaatsit atorineqartut atuupput, aalisarnermut inatsimmi atuarneqarsinnaasut.
- Imm. 3.* Kalaallit Nunaata imartaani aalisarfinni aalisarnerit nalimmassarneqarput Aqutsiveqarfinni taakkua ilanngussaq 1-mi takuneqarsinnaapput.

Kapitali 2

Akuersissut aamma piumasaqaatit

§ 3. Inuussutissarsiutigalugu aalisarnek aamma inuussutissarsiutigiginagu akuersissummik peqarnissamik piumasaqaatitaqarluni aalisarnek, taamaallaat Aalisarnermut Piniarnermullu Naalakkersuisumit tunniunneqarsimasumik akuersissummik peqarluni pisinnaavoq.

Imm. 2. Akuersissut ingerlatsisunut aalisarnermut inatsimmi kapitali 2-mi aalisarsinnaanermut piumasaqaatinik eqquutsisisunut taamaallaat tunniunneqarsinnaavoq.

Imm. 3. Akuersissut ingerlataqartumut aalajangersimasumut ataatsimut tunniunneqartarpoq kiisalu aalisarnermut aalajangersimasumik ataatsimik arlalinnilluunniit angallateqartumut, taamaattoq § 10, imm. 4 takuuk.

Imm. 4 Akuersissummik pigisaqartoq akuersissummut naapertuuttumik angallammik aalisarnermut atorineqartumik piginnittuussaaq. Tamatumanili inatsimmi kapitali 7 naaperlugu attartornissamut isumaqatigiissutinut atuutinngilaq.

Imm. 5. Inuussutissarsiutigalugu aalisarnermi kiisalu inuussutissarsiutigiginagu akuersissuteqarfusuni aalisarnermi taamaallaat angallatit pillugit nassuiaammi ilaatinneqartut kisiisa atorlugit § 2, imm. 1, nr. 14 aalisartoqarsinnaavoq.

§ 4. Aalisarnermut Piniarnermullu Naalakkersuisoq akuersissummik tunniussinermini inatsimmi aalajangersagaareersut saniatigut piumasaqaatinik atugassarititaasunillu allanik aalajangersaasinnaavoq, matumani tunisisinnaatitaanermut aalajangersakkat ilanngullugit.

Imm. 2. Akuersissummik tunniussinermi piumasaqaatit atugassarititaasullu atuarneqarsinnaassapput.

§ 5. Aalisarnermut akuersissut tunniunneqartoq, paasissutissanik aalajangersarneqarsimasunik aalisarnermut inatsimiittunnik minnerpaamik imaqartinneqassaaq, matumani angallat aalisarnermut atorineqartussaq imaluunniit angallatit aalisarnermut atorineqartussat pillugit paasissutissat ilanngullugit.

§ 6. Angallammik 6 meter a.t.t-itut angitigisumik naannerusumilluunniit aalisarnermut akuersissut inuup nammineq pigisaraa aamma aalisarnermi pisallu tunineqarneranni akuersissummik pigisaqartoq peqataasassaaq.

§ 7. Aalisarnerup aallartinnissaa, nanginneqarnissaa ingerlateqqilernissaalu sioqqullugit akuersissummut tunngasunik allannguinerit tamakkerlutik Aalisarnermut Piniarnermullu Naalakkersuisumit akuerineqassapput, matumani piginnittuunermut tunngasut allannguutaat aamma akuersissummut attuumassuteqartut angallatinik tamanik taarsiinerit ilanngullugit.

§ 8. Ingerlatsisoq toqqaannartumik toqqaannangitsumilluunniit pisassiissutinik niuerutigineqarsinnaasunik nammineq pigisanik aaqqissuussinermut ilaasoq, aaqqissuussinernut allanut ilaasuni, sinerissap qanittuani qaleralinniarnermut akuersissummik pissarsisinnaanngilaq. Ingerlatsisumut, kingusinnerusukkut pisassiissutit niuerutigineqarsinnaasut nammineq pigisat pillugit aaqqissuussinermut ilaalersumut aamma tamanna atuuppoq.

§ 9. Akuersissummik pigisaqartup akuersissut, § 3, imm. 1 malillugu taassumaluunniit nuutinnera, matumani nuutinnera qarasaasiakkoortoq ilanngullugu, aalisarnerup nalaani angallammiitissavaa.

Kapitali 3

Angallatinut piumasaqaatit

§ 10. Angallat inuussutissarsiutigalugu aalisarnermi atorineqarniartoq atulinnginnerani Aalisarnermut Piniarnermullu Naalakkersuisumit tamatumunnga siunertamut akuerseqqaarsimassaaq.

Imm. 2. Imm. 1 naapertorlugu angallammik akuersisitsiniarluni qinnuteqaat allakkatigut qinnuteqartoqareerneratigut suliarineqassaaq.

Imm. 3. Angallatit taamaallaat akuerineqarsinnaapput:

- 1) piginnittuunermut pissutsit tamanna pillugu aalisarnermut inatsimmi aalajangersakkanut naapertuuppata,
- 2) angallat nalunaarsorneqarsimappat aamma umiarsualiup ilisarnaataanik ilisarnaaserneqarsimassaaq imaluunniit sukkulluunniit maleruagassat atuuttut malillugit nalunaarsuinnermut normoqarpat aamma
- 3) aalisarnissamut periarfissiissutaasunut angallatip aalisarsinnaassusia naleqqussagaasutut nalilerneqarsimappat.

Imm. 4. Aalisarnermut Piniarnermullu Naalakkersuisup akuersissummi nalunaarneqarsimasuminngarnit angallammik allamik atuisoqarnissaa akuerigallarsinnaavaa, motooriiarnerup, amutsivimmi qaaitseqqanerup assingusumilluunniit pisup tamanna ajornartinngippagu aamma piumasaqaatit imm. 3, nr. 1-3-miittut imaluunniit kapitali 7 eqquutsinneqarpata.

Imm. 5. Naalagaaffimmut atassuteqarnermut allagartap uuttuutaanullu allagartap nuutinneri qinnuteqaammut kakkiunneqassapput, taamaattoq § 12 takuuk.

Imm. 6. Angallat tamatuma kingorna uuttortaqqinneqarpat, motooria pingaarneq taarserneqarpat allatulluunniit malunnaatilimmik allannortinneqarpat, uuttuutaanut allagartap tiguneraniit imm. 5 malillugu ullut 14-it qaangiutsinnagit uuttuutaa eqqortoq nutaaq nassiunneqassaaq.

§ 11. Angallatip piginnittua, § 10 malillugu, atia imaluunniit GR-normua tamatuma kingorna allanngorpat, naalagaaffimmut atassuteqarnermut allagartap tiguneqarneranit ullut 14-it qaangiutsinnagit naalagaaffimmut attuumassuteqarnermut allagartap eqqortoq nutaaq nassiunneqassaaq.

Imm. 2. Angallammik piginnittup akuersissutaani allannguut allanneqarsimatinnagu angallat aalisarnermut atoqqusaassanngilaq, takuuk imm. 1.

§ 12. Angallat avataasiortoq imaluunniit sinerissamut qanittorsiorluni angallat allamit pigineqalerpat, pisinnermut isumaqatigiissut, pisisumit tunisisumillu atsiorneqarsimasooq uppersaataagallartutut akuerineqassaaq, naalagaaffimmut attuumassuteqarnera pillugu uppersaataip nutaap tunniunneqarnissaata tungaanut.

Kapitali 4

Akuersissutit suussusaat

Piffissamut killilikkamut akuersissut, amerlanerpaanik pisaqarnissamut akuersissutitalik

§ 13. Piffissamut killilikkamut akuersissut, matumani amerlanerpaanik pisaqarnissamut akuersissutitalik aamma pisassiissutit niuerutigineqarsinnaasut nammineq pigisat pillugit aaqqissuussinnermut ilaanngitsaq, § 15 naapertorlugu, tassaavoq inuussutissarsiutigalugu aalisarnermut tunngavissaatitaasoq:

- 1) angallatit 120 BT aamma 17 meterimit anginerusut atorlugit,
- 2) uiluinniarnermi, angallatit angissusiat apeqqutaatinagu,
- 3) aalisarnikkut oqartussaaffiusuni, matumani nunat allat imaluunniit nunap immikkoortuini aalisarnermut suliniaqatigiiffit aalisarnermik maleruagassiornissamut piginnaatitaaffigisaanni, Kalaallit Nunaanni angallatit nalunaarsorneqarsimasut atorlugit aamma
- 4) aalisariutit Kalaallit Nunaata aalisarnikkut oqartussaaffiniittut imaluunniit nunat allamiut kalaallit akuersissutaataanik atuillutik Kalaallit Nunaata aalisarnikkut oqartussaaffiata avataaniittut.

Imm. 2. Piffissamut killilikkamut akuersissut, matumani amerlanerpaanik pisaqarnissamut akuersissummut attuumassuteqartoq, tassaavoq nunat tamalaat imartaanni maleruagassiorfigineqanngitsumi inuussutissarsiutigalugu aalisarnermut tunngavissaatitaasoq.

Imm. 3. Akuersissummik tunniussineq aallaaveqarpoq, aalisagaqatigiit pillugit pisassiissutit aalajangersarneqartut naliliivigineqarnerat, qinnuteqartut akornanni piginnaasaqassuseq aamma tunniussinnermut piumasaqaatit Naalakkersuisunit aalajangersarneqarsimasut, § 24 naapertorlugu.

Imm. 4. Akuersissut ukiut pisassiiffusut ataasiakkaarlugit tunniunneqartarpoq. Pisuni ilisimatuussutsikkut siunnersuineq ukiunut pisassiiffusunut arlaqartunut atuuttuugaangat, ilutigisaanillu pisarineqarsinnaasunik tamarmiusunik ukiunut arlalinnoortumik aalajangersaasoqaraangat, ukiunut pisassiiffusunut arlalinnut atuuttumik akuersissummik tunniussisoqarsinnaavoq.

Piffissamut killilikkamut akuersissut, amerlanerpaanik pisaqarnissamut akuersissutitaqanngitsaq

§ 14. Piffissamut killeqartumut pisarineqarsinnaasut amerlanerpaaffilernagit (paggatassiissutitik aalisarneq) akuersissut, tassaavoq akuersissut aalisarnermut tunngavisoq:

- 1) aalisagaqatigiinnik inuussutissarsiutigalugu aalisarnermut, matumani pisassiissutit aalisarneqartut Kalaallit Nunaanni angallatit nalunaarsorneqarsimasut ataatsimoorussarisaat,
- 2) angallammik 6 meter a.t.t.-itut angitigisumik naannerusumilluunniit sinerissap qanittuani inuussutissarsiutigalugu aalisarnermut, taamaattoq § 13, imm. 1, nr. 3 aamma § 15, imm. 1, nr. 4 aamma 5 takukkit,
- 3) pisuni immikkuullarissuni angallatinik Kalaallit Nunaanni nalunaarsorneqarsimasunik inuussutissarsiutigalugu aalisarneq, matumani ilisimatuussutsikkut siunnersuineq pisassiissutitik aalajangersaanissamut peqqutissaqartitsilinngippat aamma
- 4) Kalaallit Nunaata aalisarnermut oqartussaaffigisaani nunat allamiut angallataat atorlugit inuussutissarsiutigalugu aalisarneq.

Imm. 2. Imm. 1, nr. 1 aamma 2 naapertorlugit akuersissummik tunniussineq § 16 aamma § 18 tunngavigalugit pisassaaq.

Imm. 3. Akuersissummik tunniussineq, nunat tamalaat isumaqatigiissutaat aallaavigalugit imm. 1, nr. 3 naapertorlugu pissaaq.

Imm. 4. Akuersissut ukiut ataasiakkaarlugit tunniunneqartassaaq. Pisuni ilisimatuussutsikkut siunnersuineq ukiunut pisassiiffusunut arlaqartunut atuuttuugaangat, ilutigisaanillu

pisarineqarsinnaasunik tamarmiusunik ukiunut arlalinnoortumik aalajangersaasoqaraangat, ukiunut pisassiiffiusunut arlalinnot atuuttumik akuersisummik tunniussisoqarsinnaavoq.

Pisassiissutiniq niuerutigineqarsinnaasunik nammineq pigisaqarluni aalisarnermut akuersissut (PNNP-mik aaqqissuussineq)

§ 15. PNNP-mik aalisarnissamut akuersissuteqarnissaq aalisarnissamut piumasagaataapput:

- 1) Kitaani Tunumilu raajarniarnermut, angallatip angissusia apeqquaatinnagu
- 2) Kitaani Tunumilu avataani qaleralinniarnermut,
- 3) angallatit 6 meter a.t.t.-mit anginerusut atorlugit sinerissap qanittuani qaleralinniarnermut,
- 4) aqutsiveqarfik 47-mi angallammik 6 meter a.t.t.-tut angitigisumik naannerusumilluunniit qaleralinniarnermut, ingerlatsisoq pisassiissutiniq niuerutigineqarsinnaasunik nammineq pigisanik aaqqissuussinermik atuisuuppat kiisalu
- 5) Kitaani saattuarniarnermut, angallatip angissusia apeqquaatinnagu,

Imm. 2. Aqutsiveqarfimmi 47-mi sinerissap qanittuani qaleralinniarnermi, pisassiissutiniq niuerutigineqarsinnaasunik nammineq pigisanik aaqqissuussinermut ilaassanerluni imaluunniit paggatassiissutiniq aalisarnermut ilaaginnassanerluni ingerlatsisup toqqarsinnaavaa, § 14 naapertorlugu.

Imm. 3. Piginnittup pisassiissutiniq pisassai akuersisummut allanneqassapput aamma ingerlatsisumut pisassiissutiniq pisassaasa attuumassutillit ukiunut qulinoortumik amerlassuserisassa at allanneqassapput, taakku atuuttussaapput pisassiissutiniq pisassat tunniunneqarsimasut pissarsiarinerat ilanngaataallu ilanngullugit.

Imm. 4. Pisassiissutiniq niuerutigineqarsinnaasunik nammineq pigisanik atuilluni aalisarsinnaanermut akuersisummut attuumassutillimik, ukiut tamaasa ukiup pisassiiffiusup aallartinnissaa sioqqullugu ukiumoortumik pisassat pillugit nalunaarut, ukiumut pineqartumut amerlassutsimik nalunaarneqartumik aamma pigineqaratarsinnaasumik tunisassiorsinnaanermut akuersisummik kiisalu angallat atorneqartussaq pillugit paasissutissiinermik ilaqartoq tunniunneqassaaq.

Kapitali 5

Akuersisummik qinnuteqarneq

Piffissamut killilikkamut akuersissut, amerlanerpaanik pisaqarnissamut akuersissutitaqanngitsoq

§ 16. Akuersissut, § 14, imm. 1, nr. 1 aamma 2 naapertorlugu taamaallaat tunniunneqassaaq ingerlatsisunut, ukiup ullorsiuteqarfiusup siuliani akuersissutip assinganik peqarnikunut kiisalu ingerlatsisunut imm. 3 malillugu immikkut ittumik akuersisummik pissarsisimasunut imaluunniit § 18-imi piumasagaatinik eqquutsitsisunut. Akuersisummik tunniussineq tunngavissinneqassaaq qinnuteqaammik, § 17 naapertorlugu.

Imm. 2. Akuersissut, § 14 naapertorlugit 1. december sioqqullugu atorneqalersimanngippat, ukiumi ullorsiuteqarfiusumi tullermi akuersisummik tunineqarnissamut pisinnaatitaaffik annaaneqassaaq.

Imm. 3. Qinnuteqartoq, imm. 1 naapertorlugu qinnuteqarsimannginneq pequtugalugu imaluunniit imm. 2 naapertorlugu atuisimannginneq pequtugalugu akuersisummik tunineqarnissamut

pisinnaatitaaffimminik annaasaqarsimasoq, immikkut ittumik akuersisummik tunineqarnera Naalakkersuisut nalunaarutigisinnaavaat, tamanna makkuninnga peqquteqarpat:

- 1) qinikkatut suliaqarneq,
- 2) inuussutissarsiorfiit kattuffini siulersuisuni sulineq,
- 3) ilinniarneq imaluunniit ilinniartunngungajalerneq,
- 4) umiarneq,
- 5) amutsivimmiinneq,
- 6) sivitsortumik napparsimaneq,
- 7) qinnuteqartup ilaqqatut qaniginerpaasaani toqusoqarnera imaluunniit pinartorujussuarmik napparsimasoqarnera, imaluunniit
- 8) tunitsivissanik amigaateqarneq.

Imm. 4. Imm. 3 malillugu pisup pineqartup pisimaneranut peqqissaarussamik uppersaammik ilaqartumik qinnuteqaammik nassiussisoqarpat, taamaallaat immikkut ittumik akuersisummik tunniussisoqarsinnaavoq.

§ 17. Angallammik 6 meter a.t.t.-tut angitigisumik naannerusumilluunniit sinerissap qanittuani aalisarnissamut akuersisummik qinnuteqaat, qinnuteqartup angerlarsimaffittut kommunianut tunniunneqassaaq. Qinnuteqartup qinnuteqarnermi immersugassaq siunertamut tassunga atugassaq www.sullissivik.gl-imi nassaarineqarsinnaasoq, atussavaa.

Imm. 2. Angallatit allat atorlugit angallammik 6 meter a.t.t.-tut angitigisumik naannerusumilluunniit anginerusut sinerissap qanittuani aalisarsinnaanermut akuersisummik qinnuteqaat Aalisarnermut Piniarnermullu Naalakkersuisumut tunniunneqassaaq. Qinnuteqartup qinnuteqarnermi immersugassaq siunertamut tassunga atugassaq www.sullissivik.gl-imi nassaarineqarsinnaasoq, atussavaa.

§ 18. Ingerlataqartunut nutaanut akuersissutinik nalunaarutiginnittoqassaaq, tassa ingerlataqartut § 16, imm. 1 aamma 2-mi piumasaqaatinik naammassinnissimanngitsut 18-ileereernikullu kiisalu aalisarneq pillugu inatsimmi aallartinnissamut piumasaqaatinik naammassinnissimasut. Sinerissap qanittuani qaleralinniarnissamut piffissamut killilikkamut akuersissut, amerlanerpaanik pisaqarnissamut akuersissutitaqanngitsaq, qinnuteqartunut 18-inik ukiulinniit 29-nik ukiullit ilanngullugit taamaallaat akuersissut tunniunneqarsinnaavoq, taamaattoq § 19 takuuk. Qinnuteqartup taakku saniatigut piumasaqaatit makku naammassisimassavai:

- 1) Imarsiornermi ilinniarnermik angusinikuuneq imaluunniit piginnaasat assinginiq allatut iliorluni peqalernikuuneq aamma
- 2) aalisariummik kiisalu aalisarnermut atortunik, aalisarnermi atorneqartussanik pigisaqarneq.

Imm. 2. Assingusunik piginnaaneqarneq, imm. 1, nr. 1 naapertorlugu qinnuteqartup aalisarnikkut piginnaasai pillugit uppersaasiisoqarsinnaavoq ukunaninngaanniit:

- 1) najugaqarfittut kommuni,
- 2) najukkami aalisarnermut piniarnermullu peqatigiiffik,
- 3) inuk aalisarnissamut akuersisummik pigisaqartoq, qinnuteqartullu aalisaqatigisimasaa, imaluunniit
- 4) maanna sulisitsisorisaaq siusinnerusukkulluunniit sulisitsisuusimasoq.

Imm. 3. Qinnuteqartoq inuussutissarsiutigalugu piniarnermut akuersisummik imaluunniit inuussutissarsiutigalugu aalisarnermut akuersisummik peqarpat siornatigulluunniit peqarnikuuppat,

tamanna piginnaasat assinginik qinnuteqartup piginnaasaqalernikuunera pillugu nalilersuinermit ilaassaaq imm. 1, nr. 1 malillugu.

Imm. 4. Naalakkersuisut akuersissutinik nutaanik tunniussisarneq unitsissinnaavaat, aalisarnermi pineqartumi pisuussutit aalisarsinnaassutsillu akornanni pissutsit tamanna pissutissaqartippassuk. Unitsitsineq tamanna nalunaarutigineqassaaq tamanut nalunaarummik Naalakkersuisut saqqummiussinerisigut.

§ 19. Qinnuteqartoq aalisariummi ukiuni 15-ini kingullerni sumiissusersiortutut aalisartutulluunniit ukiut tallimat sinnerlugit assingusumik suliffeqarsimasoq § 18, imm 1-imi 29-nik ukioqarnissamik piumasaqaammut pinngitsuuisinnaavoq.

Imm. 2. Imm. 1-imi piumasaqaat akuersisummik qinnuteqarnermi atorfinitsinneqarsimanermit uppersaatinik nassiussinikkut uppersarneqarsimassaaq.

§ 20. Allakkatigut qinnuteqarnerup kingorna § 16, imm. 1 naapertorlugu ukiup siuliani akuersisummik peqarsimanermit piumasaqaammit kiisalu Qaanaap eqqaani Tunumilu najugalinnut qinnuteqartunut, kiisalu piumasaqaatinik § 18, imm. 1-imeersunit, Aalisarnermut Piniarnermullu Naalakkersuisoq immikkut ittumik akuersisummik tunniussisinnaavoq.

§ 21. Aalisarnermut Piniarnermullu Naalakkersuisoq §§-it 18-20, malillugit nalilersuinermit atugassanik, qinnuteqartoq pillugu paasissutissanik pisariaqartumik ilassutaasussanik pissarsiniarsinnaavoq, ukunannga:

- 1) angerlarsimaffittut kommuni,
- 2) najukkami aalisartut piniartullu peqatigiiffiat aamma
- 3) qinnuteqartup sulisitsisorinikuusai.

§ 22. Naalakkersuisut aalisarnernut ataasiakkaanut piumasaqaatinik immikkut ittunik aalajangersaasinnaapput, taakku qinnuteqartut akuersisummik tunineqassagunik aamma eqquutsissavaat, kapitali 7 takuuk.

Piffissamut killilikkamut amerlanerpaanik pisaqarnissamik ilaqartumut akuersisummik, avataasiorluni aalisarnermut akuersisummik tunniussineq

§ 23. Avataasiorluni aalisarsinnaanermut akuersisummik qinnuteqaat Aalisarnermut Piniarnermullu Naalakkersuisumut tunniunneqassaaq. Avataasiorluni aalisarsinnaanermut qinnuteqarnermi immersugassaaq, sullissivik.gl-imi nassaarineqarsinnaasoq qinnuteqartut atussavaat.

Imm. 2. Ukiumi ullorsuteqarfiusumi tullermi aalisarsinnaanermut akuersisummik qinnuteqarneq, imm. 1 naapertorlugu, 1. november sioqqullugu Aalisarnermut Piniarnermullu Naalakkersuisumut apuunneqariissaaq.

Imm. 3. Imm. 1-imi aalisarneq PNNP-mut aqqissuussinermut ilaanngilaq.

§ 24. Pisassiissutinik agguaneq, takuuk § 13, imm. 3, atugassarititat makku tunngavigalugit pissaaq:

- 1) Pisassiissutit agguanneqassapput umiarsuaatileqatigiiffinnut, ukiup siuliani pisassiissutininik peqarsimasunut aamma aalisagaqatigiinnut ataasiakkaanut pisarineqarsinnaasut tamarmiusunit umiarsuaatileqatigiiffiit ataasiakkaat pigisaannit aallaaveqartumik, tassami umiarsuaatigiiffiup pisassiissutinit piasinnaasai piviusut eqqarsaatigineqartussaammata.
- 2) Agguaassinerup kingorna pisassiissutit sinneqarsimappata, nr. 1 naapertorlugu, umiarsuaatileqatigiiffinnut pioreersunut imaluunniit Aalisarnermut Piniarnermullu Naalakkersuisumit naliliinerup kingorna umiarsuaatileqatigiiffimmut nutaamut pisassiissutit agguanneqarsinnaapput. Naliliinermi ilaatigut umiarsuaatileqatigiiffiit immikkut pisassiissutininik pisariaqartitsinnaanerit, aalisarnerup nunap ilaani ineriartornera, umiarsuaatileqatigiiffiit aningaasaqarnikkut patajaatsuunissaannik qulakkeerinninnissaq mianerineqarsinnaapput, matumani umiarsuaatileqatigiiffinnut nutaanut ukioq naallugu aningaasarsiorsinnaanikkut patajaassusilimmik aalisarnissaat kiisalu inuiaqatigiit aningaasaqarnikkut pitsaanerpaamik iluanaaruteqarnissaat ilanngullugit.

Inuussutissarsiutigiginagu sinerissap qanittuani aalisarsinnaanermut akuersisummik tunniussineq

§ 25. Naalakkersuisut inuussutissarsiutigiginagu aalisartunut saarullinnik pisassiissutininik tunineqarsinnaasunik aalajangersaasinnaapput. Pisassiissutinit taakkuninnga aalisarnissaq, akuersisummik piumasaqaateqarpoq.

Imm. 2. Qinnuteqartut, imm. 1 naapertorlugu, saarullinnik tunisisarnissamut akuersisummik angerlarsimaffittut kommuniminut qinnuteqassapput.

Imm. 3. Qinnuteqartut, takuuk imm. 1, akuersissutit tunniunneqarnissaanut piumasaqaatit uku naammassisimavaat:

- 1) qinnuteqartoq inuussutissarsiutigilugu aalisartuussanngilaq, aamma
- 2) uppernarsaatit tamarmik erseqqissumik immersorneqassapput atuarneqarsinnaassallutillu.

Imm. 4. Imm. 2 malillugu akuersissut tunniussaq tunitsivimmi takutinneqassaaq,

Kapitali 6

Immikkut aalisarnerit ilai pillugit

Sinerissap qanittuani qaleralinniarneq

§ 26. Aalisarnermut Piniarnermullu Naalakkersuisoq sinerissap qanittuani qaleralinniarnermi akuersissutit ima ittunik tunniussisinnaavoq:

- 1) § 15 naapertorlugu aqutsiveqarfik 47-mi, aqutsiveqarfinnik Qeqertarsuup Tunuanik, Uummannamik Upernavimillu ilaqartumi, PNNP-mik aaqqissuussineq aqutitigilugu aalisarnermut akuersissut.
- 2) § 14, naapertorlugu aqutsiveqarfik 47-mi aqutsiveqarfiillu sinnerini, paggatassiissutininik aalisarnermut akuersissut. Aalisarneq angallammik 6 meter a.t.t.-tut angitigisut naannerusulluunniit atorlugit taamaallaat pisinnaavoq.

Imm. 2. Aqutsiveqarfimmi 47-mi akuersisummik pigisaqartoq, tamatuma ilutigisaanut aqutsiveqarfinni allani qaleralinniarluni aalisarnissamut akuersisummik tunineqarsinnaanngilaq. Aqutsiveqarfup 47-p

avataaniittumi akuersissummik pigisaqartoq, tamatuma ilutigisaanik aqutsiveqarfimmi 47-mi qaleralinnik aalisarnissamut akuersissummik tunineqarsinnaanngilaq.

§ 27. Aqutsiveqarfimmi 47-mi qaleralinniarnissamut akuersissut Qeqertarsuup Tunuani, Uummannami Upernavimmilu (aqutsiveqarfiup iluaniittuni) atorneqarsinnaavoq.

Imm. 2. Aqutsiveqarfinnut imm. 1-imi taaneqanngitsunut akuersissut, sinerissap qanittuani aqutsiveqarfinni allani tamani atorneqarsinnaavoq, kisianni aqutsiveqarfik 47-miunngitsoq.

Imm. 3. Pisarineqarsinnaasut tamarmiusut ukiumi pineqartumi aqutsiveqarfimmi 47-mi tamakkerlugit aalisarneqarpata, aqutsiveqarfimmi tassani aalisarneq unitsinneqassaaq. Ingerlatsisoq aqutsiveqarfiup immikkoortuani allami, pisassiissutit tamakkerlutik aalisarneqarsimanngippata, aalisarsinnaassaaq.

Nipisaat

§ 28. Naalakkersuisut aqutsiveqarfinnut aqutsinissamut pilersaarutit aalajangersarneqartut malillugit nipisannut pisassiissutit ukiut tamaasa aalajangersartarpaat.

Imm. 2. Ukiumi pisassiiffusumi ataatsimi aqutsiveqarfinnut marlunnut akuersissummik qinnuteqartoqarsinnaavoq, qinnuteqartup angerlarsimaffeqarfigisaani aqutsiveqarfimmut aamma aqutsiveqarfimmut saniliusumut.

§ 29. Inuussutissarsiutigalugu nipisanik arnarlunnik aalisarneq piffissami aalisarfigeqqusaasumi taamaallaat akuerisaavoq, Aalisarnermut Piniarnermullu Naalakkersuisumit aalajangersarneqartartoq.

§ 30. Aqutsiveqarfinnut ataasiakkaanut tamanut pisassiissutit pillugit nalunaarutit, Aalisarnermut Piniarnermullu Naalakkersuisumit tamanut nalunaarnikkut Naalakkersuisullu nittartagaat aqutigalugit nalunaarutigineqartassapput. Taamatuttaaq pisassiissutit tamakkerlutik pisarineqarsimaleraangata tamanna nalunaarutigineqartassaaq.

Imm. 2. Aqutsiveqarfimmi aalisarnissamut piffissaliussap qaangiunnerata kingorna, pisassiissutit tamakkerlugit pisarineqarsimanngikkaangata, Aalisarnermut Piniarnermullu Naalakkersuisup pisassiissutit pisarineqarsimanngitsut aqutsiveqarfimmut allamut nuussinnavai.

Imm. 3. Aqutsiveqarfimmi pineqartumi nipisanniarluni aalisarnerup aallartinnissaa kingusinnerpaamik sapaatip akunneranik sioqqullugu piffissat aalisarfiusussat Aalisarnermut Piniarnermullu Naalakkersuisup nalunaarutigissavai.

Kapisillit

§ 31. Inuussutissarsiutigalugu kapisilinnik aalisarneq akuersissummik piumasaqaatitaqarpoq, Aalisarnermut Piniarnermullu Naalakkersuisumut qinnuteqarnerup kingorna tunniunneqartartoq.

Imm. 2. Akuersissut, piumasaqaatinik tulluittunik eqquutsisisuunnaq qinnuteqartunut taamaallaat tunniunneqarsinnaavoq:

- 1) Qinnuteqartoq namineerluni kapisilinnut qassutinik angallammillu pigisaqassaaq.
- 2) Qinnuteqartup kapisilinnut qassutinik qanoq amerlatigisunik peqarnini kiisalu qassutit ilusaat ilisarnaataaluunniit, qinnuteqaammut ilanngullugit ilisimatitsissutigissavai.

3) Ukiup siuliani aalisarfusumi nalunaaruteqarnissamut piumasaqaatit sukkulluunniit atuuttut naapertorlugit, nalunaaruteqartussaataaneq qinnuteqartut ukiup siuliani aalisarfusumi akuersisummik pigisaqarsimasut eqquutsissavaat.

§ 32. Inuit kapisilinnik inuussutissarsiutigalugu aalisarnissamut akuersisummik pigisallit kisimik, nalunaarutip immikkoortunut atuuffini kapisilinnik pisarinqarsimasunik tuniniaasinnaapput. Najukkami kalaalimineerniarfimmi najukkamilu suliffeqarfinnut taamaallaat kapisilinnik tuniniaasoqarsinnaavoq.

§ 33. Inuussutissarsiutigalugu aalisarnermut Naalakkersuisut ukiut tamaasa kalaallit kapisilittassaannik aalajangersaassapput kapisillit piujuartinnissaat amerliartornissaallu eqqarsaatigalugit nunat tamalaat akornanni isumaqatigiissutit isiginiarlugit.

Uiluiit

§ 34. Aqutsiveqarfinnut ukununga ukiut tamaasa pisassiissutinik Naalakkersuisut aalajangersaasarput:

- 1) Nuuk.
- 2) Aqajarua (Mudderbugten).
- 3) Attu.
- 4) Sisimiut-Kujataa (Saqqaq).
- 5) Sisimiut-Avannaa (Kangaarsuk).
- 6) Nassuttooq.

§ 35. Aalisarnermut Piniarnermullu Naalakkersuisoq, § 34-mi aalajangersarneqartutuut, aqutsiveqarfinni arfinilinni taakkunani uiluinniarluni inuussutissarsiutigalugu aalisarnermut akuersisummik tunniussisinnaavoq.

§ 36. Uiluinnut pisassiissutit § 24, malillugu agguarneqassapput, aqutsiveqarfinni sumiluunniit pisassagualarpata.

§ 37. Angallatit uiluinnik aalisarnermi inuussutissarsiorluni akuersisummik pigisallit, angallatip angissusia apeqqutaatinagu, sinerissap killeqarfullu aalisarnermut oqartussaaffiup tunngaviusumik killeqarfianit 3 sømilip avataani imartallu avataani, aalisarsinnaapput.

Kapitali 7

Angallatinik attartorneq

§ 38. Umiarsuaatileqatigiit pisuni immikkut ittuni, § 10 imm. 3, soorlu umiianermi assingusuniluunniit, aalisarnermut inatsimmi §§ 36 imaluunniit 37 naapertorlugu inuussutissarsiutigalugu aalisarnerup ingerlannissaanut angallammik Kalaallit Nunaanneersumik utaqqiisaasumik attartornissaq pillugu akuersisummik Aalisarnermut Piniarnermullu Naalakkersuisumut qinnuteqarsinnaapput.

Imm. 2. Qinnuteqartoq inuussutissarsiutigalugu aalisarnermik ingerlatsinissamut akuersisummik pigisaqartoq, imm. 1-mi pisut naapertorlugit, sivisunerpaamik qaammatini pingasuni piffissamut

attartornissamut akuerineqarsinnaavoq. Pisut immikkut ittut qaammatinit pingasunit siviluneruppata, qinnuteqaammik nutaamik qinnuteqassaaq.

Imm. 3. Qinnuteqaat makkunannga imaqaassaaq:

- 1) qinnuteqaammut tunngavilersuut,
- 2) pisut immikkut ittut nassuiaataat aamma
- 3) attartornermut isumaqatigiissut atsiugaq, oqartussaasut akuersissutaannik taamaallaat aallaaveqartoq, imm. 4 naapertorlugu.

Imm. 4. takuuk Imm. 3, nr. 3 naapertorlugu isumaqatigiisummi taaneqassaaq:

- 1) illuatungiusoq attartortitsisoq aamma illuatungiusoq attartortoq,
- 2) angallatip pineqartup aqqa ilanngullugu, radiokkut ilisarnaataa aamma nammineq illoqarfigisap umiarsualiviata ilisarnaatitut normua,
- 3) akuersissutit kalluarneqartut aamma
- 4) piffissaq angallammik attartorfusoq ullumik aallartitsiffimmik unitsitsiffimmillu ilaqartoq.

§ 39. Qinnuteqartoq inuussutissarsiutigalugu misileraalluni aalisarnissamut akuersisummik pigisaqartoq, Aalisarnermut Piniarnermullu Naalakkersuisumit akuerineqarnerup kingorna, inuussutissarsiutigalugu misileraalluni aalisarnermut periarfissiissutigineqartumi piffissami aalisarfissami, angallammik Kalaallit Nunaanneersumik attartorsinnaavoq.

Imm. 2. Attartornissamik isumaqatigiissutip nuutinnera qinnuteqartup nassiutissavaa uku ilanngullugit:

- 1) illuatungiusoq attartortitsisoq aamma illuatungiusoq attartortoq,
- 2) attartornissamik isumaqatigiissutip sivilussusia ullumik aallartiffimmik unitsitsiffimmillu ilaqartoq,
- 3) angallatip aqqa aamma siusinnerusukkut aqqa/aqqi,
- 4) angallatip piginnittuata aqqa najugaalu,
- 5) angallatip nuna erfalasoqarfia kiisalu IMO-mi (nunat tamalaat imarsiornermi kattuffiata) normua aamma
- 6) angallatip naalagaaffimmut angerlarsimaffeqarneranut uppernarsaat, uuttuutitut allagartat kiisalu angallatip IMO-mi normumik peqarneranut uppernarsaat.

Imm. 3. Ulloq unitsitsiffissaq nalunaarutigisaq sioqqullugu attartornissamik isumaqatigiissut atorunnaarsinneqarpat, qinnuteqartup tamanna Aalisarnermut Piniarnermullu Naalakkersuisumit ingerlaannaq nalunaarutigissavaa.

§ 40. Qinnuteqartoq nunami suliffissuarmik ingerlasumik peqartoq, Aalisarnermut Piniarnermullu Naalakkersuisumit akuerineqarnerup kingorna, angallatit tunitsiviit pillugit nalunaarummi sukkuluunniit atuuttumi piumasaqaatit eqquutsinnerisigut, angallammik tunitsivittut utaqqiisaasumik atorineqarsinnaasumik angallammik attartorsinnaavoq.

Imm. 2. Akuersissut ingerlatsisup qinnuteqaammik, tulluuttunik paasissutissanik kakkiussiffigineqartumik, nassiussinerata kingorna nalunaarutigineqassaaq:

- 1) Attartornissamik isumaqatigiissutip nuutinnera, tassani allanneqassapput illuatungiusoq attartortitsisoq aamma illuatungiusoq attartortoq, attartornissamik isumaqatigiissutip sivilussusia ullumik aallartiffimmik unitsitsiffimmillu ilaqartoq, angallatip aqqa aamma siusinnerusukkut aqqa/aqqi, angallatip piginnittuata aqqa najugaalu, angallatip nuna erfalasoqarfia kiisalu IMO-mi (nunat tamalaat imarsiornermi kattuffiata) normua qinnuteqartup nassiutissavai.

2) Qinnuteqartup angallatip naalagaaffimmut angerlarsimaffeqarneranut uppersaataip nuutinnera, uuttuutitut allagartat kiisalu angallatip uppersaataasa IMO-mi normuanik ilaqartoq nassutissavai.

Imm. 3. Ulloq unitsitsiffissaq nalunaarutigisaq sioqqullugu attartornissamik isumaqatigiissut atorunnaarsinneqarpat, qinnuteqartup tamanna Aalisarnermut Piniarnermullu Naalakkersuisumut ingerlaannaq nalunaarutigissavaa.

§ 41. Angallatip Kalaallit Nunaanneersup attartornissamut isumaqatigiissummik ataasiinnarmik isumaqatigiissuteqarsinnaavoq. Taamaammat angallat Kalaallit Nunaanneersup attartornissamik isumaqatigiissutitut arlalinnut attuumassutilimmik aalisarnermut ilaasinnaangilaq imaluunniit piffissami pineqartumi tassani attartornissamik isumaqatigiissuteqarsinnaanani.

§ 42. Angallat attartornissamik isumaqatigiissummik ilaasoq, piffissami pineqartumi tassani akuersissutitut, akuersissummik pigisalinnut assigiinngitsunut, ilaasinnaangilaq.

Imm. 2. Imm. 1 malillugu piffissami attartorfiusumi illuatungiusup attartortitsisup akuersissummit pigisaanit, angallat utaqqiisaasumik peerneqassaaq.

Imm. 3. Illuatungiusup attartortitsisoq, piffissami attartortitsiffiusumi angallammik allamik attartoqqusaangilaq.

§ 43. Angallatit attartorneqartut tamarmik, piffissap attartorfiusup aallartinnerani naammassineranilu, usisarfii imaqqassanngillat.

§ 44. Aalisarnermut Piniarnermullu Naalakkersuisumit akuerineqarluni qinnuteqartoq inuussutissarsiutigalugu aalisarnermik imaluunniit inuussutissarsiutigalugu misileraalluni aalisarnermik ingerlatsinissamut angallammik nunami allameersumik attartorsinnaavoq. Akuersissut tunniunneqarsinnaavoq, angallatit Kalaallit Nunaanneersut piginnaasanik pisariaqartunik, atortunik pisariaqartunik imaluunniit teknologimik pisariaqartumik pigisaqanngikkaangata.

Imm. 2. Qinnuteqartup nassutissavai:

1) Attartornissamik isumaqatigiissutit nuutinnera, tassani taaneqarsimassapput:

- a) illuatungiusup attartortitsisoq aamma illuatungiusup attartortoq,
- b) attartornissamik isumaqatigiissutit sivisussusia ullumik aallartiffimmik unitsitsiffimmillu ilaqartoq,
- c) angallatip aqqa aamma siusinnerusukkat aqqa/aqqi,
- d) angallatip piginnittuata aqqa najugaalu, aamma

e) angallatip nuna erfasoqarfia kiisalu IMO-mi (nunat tamalaat imarsiornermi kattuffiata) normua.

2) angallatip naalagaaffimmut angerlarsimaffeqarneranut uppersaataata nuutinnera, uuttuutitut allagartat kiisalu angallatip uppersaataa IMO normumik ilaqartoq.

3) uppersaatait makku pillugit, angallatip VMS-imik atortoqarnera kiisalu arlaannaatigulluunniit UNK pillugu allattuiffimmiinnginnera, naalagaaffiup erfasoqarfiusup aalisarnermut oqartussaataitaniit attuumassuteqartumiit tamatuminnga uppersaammik qinnuteqartup pissarsineratigut.

4) uppersaatait makku, angallat naalagaaffimmut erfasoqarfiusumut uku arlaannut ilaasortaaneranut tunngasut:

- a) Northwest Atlantic Fisheries Organization (NAFO),
- b) North-east Atlantic Fisheries Commission (NEAFC) imaluunniit

c) nunap immikkoortuani fisheries management organisation (RFMO), Food and Agriculture Organization of the United Nations (FAO) Port State Measures Agreement (PSMA) pillugu isumaqatigiisummik atuutsitsisut kiisalu FAO-p International Plan of Action to Prevent, Deter and Eliminate Illegal, Unreported and Unregulated Fishing (IUU) isumaqatigiissutaanik atuutsitsisut qinnuteqartup naalagaaffiup erfalasoqarfiusup aalisarnermut oqartussaaitaaniit attuumassuteqartumiit pissarsiarissavai.

Imm. 3. Angallat ukiumi pisassiiffiusumi ingerlasumi akuersisummik atuilluni ingerlasoq, imm. 2-mi, nr. 3-4-miittut pineqanngilaq.

Imm. 4. Ulloq unitsitsiffissaq nalunaarutigisaq sioqqullugu attartornissamik isumaqatigiissut atorunnaarsinneqarpat, qinnuteqartup tamanna Aalisarnermut Piniarnermullu Naalakkersuisumut ingerlaannaq nalunaarutigissavaa.

§ 45. Kalaallit Nunaata aalisarnermut oqartussaaffigisaata avataani aalisarnermut, angallammik Kalaallit Nunaanneersumik nunat allaneersut attartornerat, Aalisarnermut Piniarnermullu Naalakkersuisumut qinnuteqarnerup kingorna taamaallaat akuerineqarsinnaavoq, piumasaqaatit tulluittut atorlugit:

1) Imartami pineqartumi aalisarnermut isumaqatigiisummik tunngavissaqartoqarpat, aalisarnermut isumaqatigiisummi pingaarutilimmi tassani allatut aalajangersaasoqarsimanngippat, attartornermik isumaqatigiisummut ilaasumik angallatit aalisariutit Kalaallit Nunaanneersut aalisarsinnaanngillat.

2) Angallat Kalaallit Nunaanneersoq attartornermik isumaqatigiisummut ilaasoq, piffissami tassani akuersisummik Kalaallit Nunaanneersumik atuisinnaanngilaq. Angallat Kalaallit Nunaanneersoq piffissami attartorfiusumi illuatungiusup attartortitsisup akuersisummit pigisaanit, utaqqiisaasumik peerneqarallassaaq. Angallatit Kalaallit Nunaanneersut attartornissamik isumaqatigiisummut ilaasut pisisaat, illuatungerisap attartortup nunagisaani aalisagartassatut pisassiissutinit ilanngaatineqassapput.

3) Nunat allat imartaanni aalisagaqatigiinnik, RFMO-mit aqutsivigineqartunik, angallat Kalaallit Nunaanneersoq taamaallaat aalisarsinnaavoq, nuna pineqartoq isumaqatigiisummi atsioqataasutut atsioqataannigitsutulluunniit RFMO-mi pingaarutilimmi illuatungerisatut suleqatineqarpat.

§ 46. Angallammik attartornermut akuersissut, aalisarnermut inatsisip § 1-anik aallaaveqartumik nalunaarutigineqassaaq.

Imm. 2. Aalisarnermut Piniarnermullu Naalakkersuisoq angallammik attartornermut akuersisummik nalunaaruteqarnermut atatillugu matumani aalisarnermut inatsimmi anguniakkat anguneqarnissaat pitsaanerpaamik qulakkeerneqarnissaat siunertaralugu, atugassarititaasut pillugit aalajangersaasinnaavoq.

Kapitali 8

Aalisarnerup unitsinnera

§ 47. Pisassiissutit imaluunniit ukiumut pisassiissutit tamakkerlugit aalisarneqarpata imaluunniit piffissaq aalisarfiusussaq naappat, aalisarneq ingerlaannartumik unitsinneqassaaq aamma atortuutit tamarmik qaqinneqassapput.

Imm. 2. Angallatit Kalaallit Nunaanneersut ataatsimoorussamik pisassiissutini aalisartut, piffissaq aalisarunnaarfik naappat, tamanut nalunaarutigineqassaaq tamatumanilu Naalakkersuisut nittartagaat

aqqutigalugu aamma illuatungiusunut attuumassuteqartunut toqqaannartumik tamanna pillugu nalunaarfigineqassapput.

Imm. 3. Angallatit nunanit allaneersut Kalaallit Nunaata aalisarnermut oqartussaaffigisaani aalisartut tamarmik, piffissaq aalisarunnaarfissaq naappat, toqqaannartumik tamanna pillugu nalunaarfigineqassapput. Angallatinut EU-meersunut nalunaarutip taamaaqataa EU-Kommissionimut nassiunneqassaaq. Angallatinut Kalaallit Nunaanneersuunngitsunut allanut nalunaarutip taamaaqataa, nunap pineqartup aalisarnermut oqartussaasuanut nassiunneqassaaq.

Imm. 4. Ingerlatsisut § 14-imi aalisarnermut taaneqartumut peqataasut, imm. 1-mi piffissatut taaneqartumi pisanik pisiortornerit tuniniaanerillu tamaasa unitsissavaat.

Kapitali 9

Pineqaatissiissutit

§ 48. § 3, imm. 1 aamma imm. 4-5, §§ 6 aamma 7 § 9, § 10, imm. 1 aamma 6, imm. § 11, imm. 2 § 29, § 31, imm. 2, nr. 3, § 32 § 40, imm. 3, imm. § 41, § 42, imm. 1 aamma 3, § 43, § 44, imm. 4, § 45, nr. 1, nr. 2, oqaaseqatigiinni siulleg, aamma nr. 3, taamatullu § 47, imm. 1 aamma 4, naapertorlugit unioqqutitsineq Kalaallit Nunaanni Pinerluttulerineq pillugu Inatsimmi malittarisassat naapertorlugit akiliisitsinermik arsaarinninnermilluunniit pineqaatissiisoqarsinnaavoq.

Imm. 2. Malitassanik, peqqussutinik aalajangiinernillu kiisalu atugassarititanik Naalakkersuisunit nalunaarummi uani § 4, imm. 1, § 22, § 38 imm. 1, § 39 imm. 1, § 40, imm. 1, § 44, imm. 1 kiisalu § 46, imm. 2-mik aalajangersakkanik unioqqutitsineq sanioqqutaarinerilluunniit Kalaallit Nunaanni Pinerluttulerineq pillugu inatsimmi malittarisassat malillugit akiliisitsinermik pineqaatissiissutaasinnaapput.

Imm. 3. takuuk Imm. 1 aamma imm. 2 naapertorlugit akiligassiissutit Kalaallit Nunaanni Pinerluttulerineq pillugu inatsimmi malittarisassat malillugit inatsisitigut akisussaasut akiligassinneqarsinnaapput.

Imm. 4. Imm. 1-3 malillugit suliat siullertut qullersamut Kalaallit Nunaanni Eqqartuussivimmut suliassanngortinneqassapput.

Imm. 5. Akiliisitsinerit arsaarinninnerillu, imm. 1 aamma 2 malillugit aalajangersarneqartut, Nunatta Karsianut tutsinneqassapput.

Kapitali 10

Atuutilersitsinermut, atorunnaarsitsinermut ikaarsaariarnermilu aalajangersakkat

§ 49. Nalunaarut atuutilissaaq 1. apriliip 2025.

Imm. 2. Taamaattoq §10, imm. 3 nr. 2 aatsaat 1. januar 2026-miit atuutilissaaq.

Imm. 3. Imm. 1-ip peqatigisaanik atorunnaarsinneqarput:

- 1) Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat nr. 74 28. november 2023-meersoq.
- 2) Kapisilinniarneq pillugu Namminersorlutik Oqartussat nalunaarutaat nr. 29, 28. juli 2022-meersoq.
- 3) Sinerissap qanittuani qalerallinniarneq pillugu Namminersorlutik Oqartussat nalunaarutaat nr. 38, 19. december 2022-meersoq.
- 4) Saattuarniarneq pillugu Namminersorlutik Oqartussat nalunaarutaat nr. 1, 4. januar 2022-meersoq.
- 5) Nipisanniarneq pillugu Namminersorlutik Oqartussat nalunaarutaat nr. 8, 9. februar 2024-meersoq.

6) Uiluinniarneq pillugu Namminersorlutik Oqartussat nalunaarutaat nr. 2, 8. februar 2023-meersoq.

Namminersorlutik Oqartussat, ulloq 5. februaari 2025

Kim Kielsen (atsior.)

Aalisarnermut Piniarnermullu Naalakkersuisoq

/ Emanuel Rosing (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut